

五、關帝爺流浪記

四湖正經係小鄉鎮，鬧熱个所在正短短一站，一下子即躉透啊！小餐廳、飲料店、服飾店、郵便局這兜攞在參天宮就近。這參天宮起到足氣派，猶有一棟大大棟个香客大樓。

佢人四劍客——大漢个、小杰、阿燦和佢騎鐵馬去參天宮就近个便利商店買枝子冰食，食了枝子冰小杰提議去參天宮行行个。

參天宮頭前个門樓起到足高大！這實在係一間大廟。

「你知這間廟拜个係麼个無？」小杰問佢。

著哦！在這間大廟出出入入，借幾下擺便所，毋知拜麼个神，實在真失禮，拜麼个咧？

「玉皇大帝？」恁大个廟拜个神應當真大，毋過小杰頭搖搖。

「得你一個提示！」小杰比大廳邊脣，有隻紅色个馬，頭前有人牽馬。

「騎馬个？……敢毋即係關公？」

小杰頓頭。

阿燦接落講：「佢足欣羨桃園三結義，劉備、關羽和張飛，三個人結拜兄弟！感情真好。佢屋下正有佢一個細子，無兄弟姊妹，有時務滿足孤單个。」

小杰聽了，講：「恁佢人四個來結拜好啊，佢人係桃園三結義，佢人係鹿場四結拜，這個意見好無？」

小杰這兜事真合佢意，佢嘛係單丁子，在這站時間內底，和佢人三個人作埕奈，得佢足歡喜个！「好啊！」佢隨應聲，小杰、阿燦和佢三個人攞講好，作埕拗目光望向大漢个，這個大漢个屋下兄弟姊妹毋會少，講有五個，在這滿實在係真難得。

「無問題！」大漢个真爽快回答，擱講：「緣投鈞，熟事你真好！雖然佢人正作埕無一個月，毋過感覺足投緣个！」

佢人四個嘛毋知愛仰子結拜，想起布袋戲內底有一段事講：「無求共年共月共日生，正願共年共月共日死。」講了四個人攞伸出正手相疊，大漢个頭大係大哥（佢真暢喏！因為佢在屋下係頭細个！）細漢个小杰比佢大五日，猶係愛乖乖喊佢二哥，佢足歡喜个！一直講：

「大五日嘛係大！嘿嘿！」佢係第三，啊阿燦頭細係四弟。

阿燦嘛感覺歡喜，講：「以後有三個阿哥好靠啊。」講煞了後真認真个雙手合掌拗腰講：「請多多照顧。」舞到佢人攞笑啊。

阿燦拗佢人講，佢个阿公真俗意講關公个故事，自細阿燦个阿公即渡佢去參天宮拜拜，拗佢講：「偲人个關帝爺真靈！佢庇佑偲人个家鄉，庇佑鄉民平平安安。」在神頭前企个兩儕，烏面个係周倉，斯文白面个係關平，佢人兩儕係關公手內个兩個大將。啊遐隻紅色馬係赤兔馬，係關公个坐騎。

臺灣，對長山人來講係一坵夢土，得一陣又一陣長山人甘願冒渡過烏水溝（臺灣海峽）个危險，即係希望會用去到寶島開創新家園。在三百外年前，清朝乾隆年間，長山人奄師个祖先聽講臺灣个土地真肥，毋管種麼个攞會用生到大擱靚，收成擱好！奄師个祖先聽了真興，決定出外鄉去臺灣。

離開家鄉進前，心內多多少少攞會心神無定，家鄉个老輩講：「請偲人个神——關帝爺陪你人去！神會庇佑你人个。」落來奄師个祖先特別恭請神明來臺，神明嘛庇佑這火灶平安个渡過烏水溝，在南臺灣安定落來。

奄師个祖先恭請个這身神較細，正有七吋二高，威風凜凜坐在龍椅面上。奄師个祖先早暗奉祀關帝爺，辛辛苦苦開墾新家園，真難得豐收啊，過了一站平安个日子。無想著抗清事件一件又一件起來，為著屋下人平安，只好真毋盼離開南部，隨神明滿那位遷徙，過流浪个生活。

恁个日子過了百外年，大討在光緒元年（西元1875年）神明跨奄師來到四湖。奄師到四湖了後，熟事了吳石，兩儕真對同，無事毋講，即像係親兄弟，感情全然好。奄師決定留在四湖，歸屋下人自這時起蹣落來。

為著飼一屋下過生活，奄師在四湖開創新事業，萬事起頭難，奄師一個人「學校長兼推鐘」麼个攞做，無閒到無時間起廟奉祀關帝爺，正會用拗神明借園在吳石屋內，早暗行香。

遐時務鴉片在時行，對長山時行到臺灣，鴉片个惡勢力一步一步傳開，嘎嘛傳到單純个四湖，毋會少人跨時行食鴉片薰，自底正興興

試食一兩嘴，無想著一食即著願啊。

著鴉片毒係一件得人驚个事情，歸個人變到懶懶，麼个事情擺無法度做，一日到暗正想討倒个食鴉片。鴉片薰薰到毋會少人屋下擺敗去，真慘啊！鄉民想討戒薰，毋過戒無幾下日又毋會堪。

吳石脛著心內真毋盼，請關帝爺鬥相共這兜人戒毒。關帝爺正經真靈，得這兜求救个人戒薰成功啊！戒鴉片薰成功个事一傳十，十傳百，得擱較多人拗神明求救，嘛得擱較多人變做神明个信徒。

在清宣統元年（西元 1909 年）瘴無聲無氣个來到四湖，瘴到个所在，鄉民供个雞、鴨、豬這兜擺破病死去，得人驚个瘴得鄉民驚壞壞、無奈何。落來有人提議請關帝爺出巡覓境，請出神明了後，神明行過个所在，著瘴个頭牲一隻隻好俐俐啊，鄉民越來越感激關帝爺个庇佑，自這時起拜个人越來越多，毋管麼个疑難雜症擺拗關帝爺祈求。破病个好俐俐啊、做生理个大趁錢啊、作田个豐收啊.....，神明名聲傳遠遠，落來鄉民提議設王爺館來奉祀神明，吳石嘛真歡喜，答應啊。

恁又過了足多年，關帝爺个信眾越來越多。在民國十三年（西元 1924 年）信眾想講神明得大家生活好過，應當愛起一間關帝爺廟。起廟个提議一聲喊，百聲應，吳石先生黏時捐土地來鬥相共。這正經係莊內个大事，鄉民有錢出錢，有力出力，走從撿錢起廟，廟即恁起好啊，擱安名做「四湖參天宮」。這個「四湖參天宮」毋若四湖人供奉參拜，即和外縣市擺有人遠遠來，香客連續直直來，香火真旺。

臺灣這坵土地正經係多災多難，日本統治臺灣期間推行皇民化運動，用整理寺廟當作理由，嘎做了得人受氣个事情——拆廟、收集歸下祭拜物品，所以園在廟內个文物，像係名人字畫、歷代古董做一下得佢人收去啊！毋若恁，擱較得人受氣个係日本政府用「昇天祭」做借嘴，拗莊內大大細細廟个神明擺集中在四湖國小，一葩火燒燒莫！

毋過即在大火猛猛个時，好定泥有一身神像發出光箭箭个金色光線，光線四射曠熠到得人目珠擘毋會開，發出光線个即係關帝爺！負責放火燒神像个日本人脛著啊，驚到毋敢擱燒，攔緊拗火用莫，嘛毋敢擱想麼个齣頭啊，落來拗神明偷偷遷徙到北部奉祀。

臺灣光復了後，會用擱自由拜神，鄉民一心想討拗關帝爺請轉來

供奉，毋過遐時務神明猶在日本人手內，鄉民你睭你，你睭你，正會用故大氣！無奈在想：「神明麼个時務正會用轉到四湖鄉？」落來，日本人愛得人遣返，緊急通知鄉民護送神明轉來家鄉，鄉民知這個好消息攞足歡喜，請關帝爺轉个時，歸路放炮聲毋會恬，大家誠心誠意在路脣慶祝。

過了恁多風波，關帝爺總算轉來啊！轉到四湖鄉守護這坵土地！關帝爺照顧四湖人，四湖人嘛毋會添放關帝爺，這應當嘛算一種義氣！